

Vorred.

redenden Taub vnnnd Stumm durch ihre Pseudolehr werden: die reinen vnrein / vnnnd ein Schwarzer Sathanischer Rab an stadt des H. Geistes verehret / vnnnd in der Armen Leuth herzen enngeführet wirdt / vnnnd gehe leider Gott erbarmt / zu dieser vnserer jetzigen zeit zu nach den Worten CHRISTI, daß ein blinder den andern führet / vnd sie fallen beede in die hellische Gruben der Ewigen verdammuß.

Was in Theologia Theophrastus præstiert / vnnnd auß sonderlichem befelch vnd willen Gottes außgerichtet / in deme er vns einig vnd allein widerumb zu CHRISTO IESV (Von dem die ganze Welt im Newen Testament abfellig worden / wie im Alten Testament von Gott dem Vatter) führet / vnd weiset / vnnnd vns die H. Schrifft auß Englischem vñ Cabalistischem Grund erkleret / das werden seine Scripta wills Gott in kürz erweisen / mit denen ich bald einen anfang machen will : Dardurch die arme / mühselige vnnnd zerschlagene herzen sollen zu gewünschter ruh / die bey CHRISTO IESV ist / Matth. II. gedultiglich gelangen / weil der glauben vnnnd Religionen in der Welt so viel / daß der arme einfeltige Lay nimmer weißt / was er glauben / vnd wem er folgen soll / da doch CHRISTVS außtrucklich sagt : Ich bin das Liecht der Welt / wer mir nachfolget / der wirdt nicht im finstern wandeln. Dieses Liecht werden wir wills Gott durch die Theophrastische Thewre Panegyrische / ja wol vnd recht Paramirische Schrifften widerumb frölich finden vnnnd anschawen / darzu er selbst CHRISTVS IESVS, vmb seiner ehz / glori / vnd vndergetrucktes Bitschier Majestet / wie auch vmb vieler 1000. armer Seelen seligkeit willen / daß sie auß dem Reich der finsternuß vnnnd des Teuffels raachen mögen heraus gerissen werden / seine starcke Allmechtige hilffreiche hand vñ beystand sampt dem Vatter vnd H. Geist / kressftiglich vnd vätterlich reichen vnd darbieten wolle. Exsurgat Deus, & dissipentur omnes inimici tui. Item : Sede à dextris meis donec ponam inimicos tuos scabellum pedum tuorum, &c. Die zeit ist nun vorhanden / daß diese Propheceyung sollen vnd müssen erfüllet werden.

Von Theophrasto vnnnd seinen Encomiis wollen wir jeko
nichts.